

obtidos en condicións de reproducibilidade (é dicir, con material idéntico tratado por operarios en distintos laboratorios, utilizando o método de ensaio normalizado) dentro dos límites dunha probabilidade específica (en principio, 95 por 100); de onde: $R = 2,8 \times s_R$.

s_R = desviación típica calculada a partir dos resultados obtidos en condicións de reproducibilidade.

RSD_R = desviación típica relativa calculada a partir dos resultados obtidos en condicións de reproducibilidade $[(s_R / \bar{x}) \times 100]$.

b) Requisitos xerais: os métodos de análise utilizados para o control dos produtos alimenticios deben cumprir as disposicións do Real decreto 1397/1995, do 4 de agosto, polo que se aproban medidas adicionais sobre o control oficial dos produtos alimenticios.

c) Requisitos específicos: mentres non se prescriba a escala comunitaria ningún método específico para a determinación do contido de ocratoxina A nos produtos alimenticios, os laboratorios poderán aplicar calquera método da súa elección, coa condición de axustarse ós seguintes criterios:

Características do método respecto á ocratoxina A

Contido µg/kg	Ocratoxina A		
	RSD _R (%)	RSD _R (%)	Recuperación
< 1	≤ 40	≤ 60	50 a 120
1-10	≤ 20	≤ 30	70 a 110

1.º Non se indican os límites de detección dos métodos utilizados, posto que se dan os valores de precisión para as concentracións que presentan interese.

2.º Os valores de precisión calcúlanse a partir da ecuación de Horwitz:

$$RSD_R = 2^{(1-0,5 \log C)}$$

onde:

a) RSD_R representa a desviación típica relativa calculada a partir dos resultados obtidos en condicións de reproducibilidade $[(s_R / \bar{x}) \times 100]$.

b) C é a taxa de concentración (é dicir, 1 = 100g/100g, 0,001 = 1000 mg/kg).

Trátase dunha ecuación xeneralizada de precisión, que se revelou independente do analito e da matriz e unicamente dependente da concentración na maioría dos métodos correntes de análise.

d) Cálculo da taxa de recuperación: o resultado analítico exprésase en forma corrixida ou non en función da recuperación. Deberá indicarse a forma de expresión e a taxa de recuperación.

e) Normas de calidade aplicables ós laboratorios: os laboratorios deberán axustarse ás disposicións do Real decreto 1397/1995, do 4 de agosto, polo que se aproban medidas adicionais sobre o control oficial dos produtos alimenticios.

XEFATURA DO ESTADO

5175 *LEI 2/2003, do 12 de marzo, de modificación da Lei 32/1999, do 8 de outubro, de solidariedade coas vítimas do terrorismo.* («BOE» 62, do 13-3-2003.)

JUAN CARLOS I

REI DE ESPAÑA

Saiban tódolos que a viren e a entenderen que as Cortes Xerais aprobaron e eu sanciono a seguinte lei.

EXPOSICIÓN DE MOTIVOS

A Lei 32/1999, do 8 de outubro, de solidariedade coas vítimas do terrorismo, nace, como di a súa exposición de motivos, polo acordo unánime de tódolos grupos políticos con representación parlamentaria como tributo de honor da sociedade española ás vítimas da violencia terrorista.

As vítimas, segue dicindo a exposición de motivos, son o expoñente dunha sociedade decidida a non consentir que nada nin ninguén subverta os valores da convivencia, da tolerancia e da liberdade e constitúen o máis limpo paradigma da vontade colectiva dos cidadáns a prol dun futuro en paz que se ha de construír desde o diálogo, o consenso e o respecto recíproco entre as diversas opcións políticas que teñen a representación lexitima da maioría.

A prol da solidariedade, establécese o dereito dos damnificados a seren resarcidos ou indemnizados polo Estado. A esta indemnización terán dereito as vítimas de actos de terrorismo ou de feitos perpetrados por persoa ou persoas integradas en bandas ou grupos armados ou que actuaran coa finalidade de alterar gravemente a paz e a seguridade cidadá.

Canda estas indemnizacións establecéronse unhas distincións honoríficas, en grao de Gran Cruz a título póstumo, ós falecidos en actos terroristas, e, en grao de Encomenda, ós feridos e secuestrados en actos terroristas, incluídos no ámbito de aplicación considerado no artigo 2 da citada lei.

Xa que logo, a aplicación desta lei, no que se refire a estas distincións honoríficas, levou o Grupo Parlamentario Socialista a considerar necesaria unha modificación que, á vez que restituía o espírito que animou o lexislador, distinga entre ámbolos conceptos desde o punto de vista da súa concesión, porque ambos son conceptos diferentes. O primeiro, como di a exposición de motivos da referida lei, é un deber de solidariedade do Estado coas vítimas do terrorismo; o segundo é unha distinción honorífica, un recoñemento civil ás vítimas, un honor da sociedade respecto daquelas nas que concorran méritos cívicos e os valores democráticos amparados pola nosa constitución.

Por todo iso, apróbase esta lei.

Artigo primeiro.

Un. Dáselle unha nova redacción ó artigo 4 da Lei 32/1999, do 8 de outubro, de solidariedade coas vítimas do terrorismo, que terá o seguinte contido:

«Artigo 4.

1. Co fin de honra-las vítimas do terrorismo, créase a Real Orde de Recoñemento Civil ás Vítimas do Terrorismo.

2. O Goberno, logo de solicitude dos interesados ou dos seus herdeiros, concederá as condecoracións consideradas neste artigo no grao de Gran Cruz, a título póstumo, ós falecidos en actos terroristas, e, no grao de Encomenda, ós feridos e secuestrados en actos terroristas.

3. As mencionadas condecoracións en ningún caso poderán ser concedidas a quen, na súa traxectoria persoal ou profesional, mostrasen comportamentos contrarios ós valores representados na Constitución e nesta lei e ós dereitos humanos recoñecidos nos tratados internacionais.»

Dous. Introdúcese un novo artigo 4 bis na Lei 32/1999, do 8 de outubro, de solidariedade coas vítimas do terrorismo, que terá o seguinte contido:

«Artigo 4 bis.

1. O Goberno, por proposta do ministro da Presidencia e no prazo máximo de tres meses contados desde a entrada en vigor desta lei, aprobará o Regulamento da Real Orde de Recoñecemento Civil ás Víctimas do Terrorismo.

2. Corresponderalle ó Ministerio da Presidencia a tramitación dos procedementos de concesión das condecoracións previstas neste artigo, quen elevará á aprobación do Consello de Ministros, mediante real decreto, a proposta de concesión do grao de Gran Cruz, ou concederá, mediante orde e en nome da Súa Maxestade El Rei, o grao de Encomenda.

3. A consideración de vítima de acto terrorista quedará acreditada mediante o informe preceptivo do Ministerio do Interior, ou ben mediante o recoñecemento por parte da Administración xeral do Estado de pensión extraordinaria por acto de terrorismo, ou por sentenza xudicial firme.

4. O prazo máximo para notificar a resolución das solicitudes será de 12 meses desde a data de entrada no rexistro do órgano competente para a súa tramitación.

Naqueles procedementos nos que non recaia resolución dentro do prazo sinalado, entenderanse estimadas as solicitudes.

5. A resolución estimatoria ou desestimatoria porá fin á vía administrativa e contra ela poderá interperse recurso contencioso-administrativo.»

Artigo segundo.

Engádese unha nova disposición adicional á Lei 32/1999, do 8 de outubro, de solidariedade coas vítimas do terrorismo, que será a disposición adicional segunda, coa seguinte redacción:

«Disposición adicional segunda.

Cando os actos descritos no punto 1 do artigo 2 se cometesen fóra do territorio nacional, por persoas ou grupos que non desenvolvan a súa actividade terrorista principalmente en España, o Ministerio do Interior poderá conceder axudas excepcionais ós españois vítimas de tales actos, nos termos que regulamentariamente se determinen.

O previsto nesta disposición será aplicable ós actos ocorridos a partir do 1 de setembro de 2001.»

Por tanto,

Mando a tódolos españois, particulares e autoridades, que cumpran e fagan cumprir esta lei.

Madrid, 12 de marzo de 2003.

JUAN CARLOS R.

O presidente do Goberno,
JOSÉ MARÍA AZNAR LÓPEZ

5450 LEI ORGÁNICA 2/2003, do 14 de marzo, complementaria da Lei sobre a orde europea de detención e entrega. («BOE» 65, do 17-3-2003.)

JUAN CARLOS I

REI DE ESPAÑA

Saiban tódolos que a viren e entenderen que as Cortes Xerais aprobaron e eu sanciono a seguinte lei orgánica.

EXPOSICIÓN DE MOTIVOS

A Lei 3/2003, do 14 de marzo, sobre a orde europea de detención e entrega, establece no artigo 2 a designación das autoridades xudiciais de execución, atribuíndo a estas a competencia para proceder ó cumprimento das ordes europeas de detención e entrega que deban executarse en España. Por este motivo, é necesario modificar a Lei orgánica 6/1985, do 1 de xullo, do Poder Xudicial, que enumera as competencias dos órganos xurisdiccionais.

O artigo 65, punto 4, da Lei orgánica do Poder Xudicial atribúelle á Sala do Penal da Audiencia Nacional a competencia sobre os procedementos xudiciais de extradición pasiva, polo que é procedente engadir a este precepto a competencia sobre o cumprimento das ordes europeas de detención e entrega. Así mesmo, no artigo 88 da citada lei orgánica atribúeselles ós xulgados centrais de instrucción a tramitación dos expedientes de extradición pasiva, de xeito que, igual ca no caso anterior, debe engadirse a atribución de competencia sobre os expedientes derivados das ordes europeas de detención e entrega.

Artigo único. *Modificación dos artigos 65.4.º e 88 da Lei orgánica 6/1985, do 1 de xullo, do Poder Xudicial.*

Un. O punto 4.º do artigo 65 da Lei orgánica 6/1985, do 1 de xullo, do Poder Xudicial, terá a seguinte redacción:

«... 4.º) Do procedemento para a execución das ordes europeas de detención e entrega e dos procedementos xudiciais de extradición pasiva, sexa cal fose o lugar de residencia ou en que tivese lugar a detención do afectado polo procedemento.»

Dous. O artigo 88 da Lei orgánica 6/1985, do 1 de xullo, do Poder Xudicial, terá a seguinte redacción:

«Na Vila de Madrid poderá haber un ou máis xulgados centrais de instrucción, con xurisdicción en toda España, que instruirán as causas que lle corresponde xulgar á Sala do Penal da Audiencia Nacional ou, se é caso, ós xulgados centrais do penal e que tramitarán os expedientes de execución das ordes europeas de detención e entrega, así como os expedientes de extradición pasiva, nos termos previstos na lei.»

Disposición derradeira única. *Entrada en vigor.*

Esta lei orgánica entrará en vigor o día seguinte ó da súa publicación no «Boletín Oficial del Estado».

Por tanto,

Mando a tódolos españois, particulares e autoridades, que cumpran e fagan cumprir esta lei orgánica.

Madrid, 14 de marzo de 2003.

JUAN CARLOS R.

O presidente do Goberno,
JOSÉ MARÍA AZNAR LÓPEZ